

In fundament finanziel solid

In retgav da taglia creschent ed entradas supplementaras han augmentà il gudogn dal chantun

■ (anr/ac) Il chantun Grischun stat finanzielmain sin buna chomma. Il quint statal 2018 preschentà la gievgia passada a Cuira dal nov minister da finanzas Christian Rathgeb noda in gudogn operativ da 105 milliuns francs che stat visavi ad in deficit prognostigà da 33 milliuns francs. Grazia a las entradas da taglia che flessegian en abundanza ed entradas extraordinarias.

Dapi intgins onns sa repeta l'istorgia. Il preventiv chantunal prognostigtescha cifras cotschnas che vegnan regularmain surpassadas da la realitad finanziaria. Uschia è in minus da 33 milliuns francs nudà en il preventiv sa midà en in gudogn operativ da 105 milliuns francs per l'onn passà. Sco quai ch'il cusseglier guvernativ Christian Rathgeb e ses collavurats dal departament da finanzas han explitgà la gievgia passada a Cuira ha l'augment da las entradas da taglia contribuì al bun resultat. La taglia sin entrada e facultad è creschida l'onn passà per 16 milliuns vers l'onn 2017 ed anc pli fitg èn las entradas da taglias sin gudogn tras la vendita d'immobiglias, taglia sin ierta e donaziuns creschidas (+18 milliuns) sin ina summa totala da record dad 803 milliuns francs.

Indicats per in bun svilup economic dal chantun Grischun. Ulteriurs facturs, sco la cumpart dubla al gudogn da la Banca naziunala (31,4 milliuns francs), restituziuns dal Servetsch autopostal svizzer (17 milliuns francs) ed in quint stradal cun in surpli d'entradas (12,7 milliuns francs) han, tenor las indicaziuns dal chantun, contribuì essenzial al bun quint statal dal chantun Grischun. Sper l'uschenumnà gudogn operativ pre-



Il nov minister da finanzas grischun Christian Rathgeb ha dastgà preschentar in allegraivel quint statal per l'onn 2018.

FOTO PH. BAER

schentà il chantun anc in ulteriur resultat, numnadamain il retgav total. In retgav cun in plus da 2,7 milliuns francs in buntant pli modest, atgnamain ina nulla naira.

In resultat per agen diever e l'auter per la confederaziun

Il retgav total resguarda auter ch'il gudogn operativ las sperditas contablas sin valurs finanzielas dal chantun per gron-

da part d'attribuir l'onn passà als scrits da participaziun da la Banca chantunala ed a las aczias da la Ems Chemie (-21,1 milliuns francs) e la reserva decidida dal cussegl grond a favur dil nov center da Scola auta a Cuira (-90 milliuns francs). A la preschentaziun dal quint statal la gievgia passada a Cuira è la dumonda davart la valur dals dus resultats sa tschentada. Tenor las explicaziuns dal cusseglier guvernativ e ses col-

lavorats dettia il gudogn operativ pled e fatg davart il spazi d'agir finanziel dal chantun. E quai spazi valitescha il departament da finanzas per intact. Quai demussa la buna quota dad atgna finanziaziun dal chantun Grischun da bainprest 120 procent. L'agen chapital disponibil tutga ad 821,4 milliuns francs, per 38 milliuns pli aut che l'onn precedent. Il retgav total, ina grondezza contabla resguardada en l'economia privata, serva

ord vista chantunala primarmain sco indicatur da la situaziun finanziaria dal chantun Grischun visavi a la confederaziun ed als ulteriurs chantuns. En la discussiun da reglar da nov la gulivaziun da finanzas tranter chantuns e confederaziun saja d'avantag sch'il chantun na sa preschentia finanzielmain betg en in memia bun stan, esi stà dudir a la preschentaziun dal quint statal. Autas en vinavant las investiziuns nettas dal chantun stadas, l'onn passà cun 239,7 milliuns francs per 18,2 milliuns pli autas che l'onn 2017. Vinavant ha il cusseglier guvernativ fatg attent ad ina buna disciplina d'expensas. Uschia èn las expensas da persunal creschidas levamain, ils custs da manaschi visavi l'onn 2017 èn regressivs. Ils gronds posts d'expensas dal chantun Grischun èn las spartas traffic (354 milliuns francs), scolaziun (358 milliuns), segirtad sociala (340 milliuns) e sanadad (262 milliuns).

Bunas perspectivas

Il cusseglier guvernativ Christian Rathgeb ha discurrì da bunas perspectivas finanzielas. El quinta era per l'onn 2019 cun in resultat operativ positiv. Grazia ad ina contribuziun dubla nà dal gudogn da la Banca naziunala ed in modest augment da las expensas. Il cusseglier guvernativ ha discurrì da meglieraziuns prevesiblas vers il preventiv 2019. A partir da l'onn 2021 vesa il schef dal departament da finanzas e vischnancas in spazi finanziari pli stretg per il chantun Grischun pervia dal nov agiustament da la giulivaziun da finanzas e pervia da la refurma da l'imposiziun da taglia sin interpresas e la finanziaziun da l'AVS.